



12272

夕陽書屋詩初編卷三

聖駕幸翰林院恭紀

海陽程盛修



當年珥筆廁清華御燭宮壺出
帝家自此臺垣遷秩後花磚重認舊官衙

詔許乘輿駕六龍玉堂鷓鴣慶遭逢紅雲捧處
天顏近都到蓬萊頂上峯

皤皤二老頌詞臣教術親承指示真華國文
章應記取由來宰相讀書人

昆明法曲綺筵開千古詞人沈宋才一自

夕陽書屋詩初編卷三

一

天葩歌復旦何須侈說夜珠來

異數洵堪掌故傳昨宵靈鵲噪廳前柯亭劉
井成佳話添入瀛洲道古編

聖駕幸貢院恭紀

蓆帽蹉跎歲月湮廿年拜爵列朝紳今番

玉趾親承寵尚念秋風矮屋人

經術文章貫古今三條燼落費沉吟
廟堂

亦有光明燭照見諸生五夜心

三載培風養翮餘先資拜獻沐恩初勲華贊

治基方始敢道臯夔不讀書

睿藻紛綸

御墨鮮

天心期望倍拳拳從茲鑽

院紗籠處萬口爭傳彩鳳箋

聚奎 恩命典攸隆關節丕休未許通以人

事君須仰副莫教黷底有枯桐

銅雀瓦歌爲孫殿雲賦

奸雄粉黛俱黄土空向西陵貯歌舞好事雕鐫到
廢陶千載詞人伴縑楮須信文字有長年不隨霸
業冷寒烟一經品藻如異寶永結人間翰墨緣我
曾訪古荒臺畔粼粼淺碧漳河岸樂府歌行弔建
安秋風葦荻鴉聲亂君今下筆墨光飛剩水殘山
送落暉君有味七十二墳無覓處遑問瓴甌是耶
非

呂孝子歌

同年呂無蹊子聞父說
繫兼程入都以憂憤卒

有子有子天一方妖夢是踐心徬徨急往從之川
無梁酸風射眸日沉光父冤未雪兒羸匱九閻岩
堯誰訴將奄然一息歸北邙魂飛湯火侍翁旁皇
天有眼出膺滂思兒不見淚盈匡人生那用多感
傷生非虛生死非殤但使親在且無殃百年鼎鼎
留綱常愧彼七尺空昂藏

送儲越漁之納溪任

名流多愛蜀捧檄到蠶叢杜老兼坡老文翁又了
翁淵源千載合教養一般同仕學原非二方知儒
術工

回首荆南路烟霞別故溪莫嫌鄉夢遠一任子規
啼閣道穿雲入懸崖壓日低此間卽釀好醉墨待
留題

題王孟亭太守硯影圖

研背刻髯翁笠屐
像得於揚州市中

誰向陶泓認化身無端物色在埃塵自來氣味親
風雅轉落江湖閱苦辛笠屐流傳多附會鬚眉影
響亦精神吾儕尚論悲陳蹟何用區區辨假真

夕陽書屋詩初編卷三

三

輓馬相如中翰

千佛無名一笑捐

君屢躓禮闈
不屑入試

依然未嫁老嫗娟

慈闈遠隔三千里薄宦卑栖十四年

君壬子鄉薦
後卽就職中

書母年八十中
間纔一歸省

每憶狂吟聲激越慣看泥飲舞蹁

躑誰知撒手游行日故態分明在眼前

前三日於
桐城師相

宅誦平生得意詩豪飲極
歡卽於席間得疾不起

同年陶次南八十

晨星寥落黯銷魂蘭譜今看碩果存尚可傳經來

弟子不須撰杖倩兒孫晚年官入新除目

選期日
將屆

下衫留舊酒痕

每於公車
必爲招集

爲道廣川消息好一般

瞿樂慶師門

景州座主年七十
八矣康強善飯

壽李母查孺人

何須咏筐筥且莫頌椒蘭眼前兒女態總不上毫
端生長名閨荪彤史一朝憂患憑空起白璧青蠅
任爾曹風鬟霧鬢隨夫子絕塞邊聲咽暮笳月爲
明鏡雪爲花誰知共命南枝鳥牛衣對泣天之涯
樂府刀鐶偶然遂諸姑伯姊驚拭淚報施有子子
復賢嚴霜歷遍陽春至

寶研堂歌爲楊學山給諫賦

日逐天街薄笨車案牘塵鞅交紛拏誰於此間得

夕陽書屋詩初編卷三

四

解脫鬧裏尋閑趣佳楊君標格清於雪結廬瀟
灑非官衙闔闔遙開跌蕩蕩西山墻角明朝霞軫
軒疏寮足位置移花分竹陰周遮曾聞清森書畫
夥又聞清閔鼎彝賒先生嗜好負真癖摩挲光怪
窮義媯何從獲此一方石不數蒼璧楮而窪貌完
質古動流輩顏曰寶研文詞葩

曹永持太
史作記

法物名

蹟雅稱是精巧一一生咨嗟走也麓服亂頭耳對

君形穢多疵瑕會須吟咏夜繼日譙樓任報鼓三
槌興酣落筆布新硯相與潑墨忘塗鴉雲亭載酒

有故事無煩溯洄秋水咏蒹葭

許滄亭招飲同薄圖南吳夔龍吳穎菴諸前輩
輩王萊堂柴禹門丁南屏吳慎堂家驥超
同用東坡先生七月五日韻二首

衙退覓靜綠戶小卻酒務折柬就君談鄙吝消叔
度况復佐大烹爾羊恣割煮饗子技何奇堆盤細
覩縷是日以全羊餉客載咏銀臺詩英英筆垂露君亦撚

吟髭詞源競奔注

習習涼颺生娟娟新月上井梧早報秋翩然集瑜
亮消息從南來淮黃驚泛漲適得南河水信部屋待澤深

壺漿誰見餉肉食鄙吾曹遜聽增惆悵拯溺有嘉

名陽書屋詩初編卷三

五

謀泥飲非疎放

瀛臺侍宴恭和

御製元韻

綠陰深處響珠珂湛露恩濃喜歲和

聖德勤民惟寶穡天心助順正登禾歡流燕鎬風
如昨陪賞卷阿事已過典禮只今誇再盛
颺端可被絃歌

節入高秋景物稠宛疑瑤島望中浮窗分黛
色濃兼淡檻過泉聲咽復流人影畫橋楊柳
岸烟開柔艣木蘭舟承恩幸侍

勳華主始可迴翔到上頭

黃花翠篠總便娟點逗秋光破曉烟
嫋嫋風輕猶拂面融蝠日暖正當筵
堂庶盛事文章著山水清音法曲傳
先後同符俱不朽

昇平佳話萬斯年

宴罷

溫綸尚許留

聖恩稠疊迥難酬那知

幾暇優游地

特予臣工泮奐秋藉草捫蘿平似毯
穿雲引水曲

名陽書屋詩初編卷三

六

如鈎半生蠟屐耽蠟壺方信人間有十洲

又恭紀十六首

太液池頭醉管絃曾從文獻溯當年不圖躬

遇

昇平宴露白葭蒼八月天

康熙辛酉年曾一
舉行今茲再盛

九重宵旰切民咨正值秋登萬寶時天淡雲閒風

景別山開圖畫水漣漪

澤下天潢及從臣龍光次第沛陽春
鯁生自分甘

樗散也有

恩波到涸鱗

閨闈門開列炬賒東華魚貫出西華曉風殘
月朝官慣早有晨鐘起曙鴉

簪裾翔濟苑西頭鵠立遥瞻瑞靄浮聽說

君王麾玉輦新涼天氣盪蘭舟

泱泱晴光曳水紅古槐疎柳畫橋風

繡旗颭處山呼起聲在鷗汀鷺渚中

積翠遙間曉鏡開肴玉俎日邊來何須侈

說金莖露三浥天漿激灑杯臣已未至今御宴

法曲悠揚宛轉生歌喉妙得古人情漢唐韻

事傳千載是日演栢梁臺昆明池諸劇翻出新聲爾許清

夕陽書屋詩習卷三

七

紉纓欣聞

帝作歌

神思睿藻決江河書生倚待空長技今日方知閣

筆多

流杯亭畔水泠泠搜句巡簷許暫停內侍擎

來穀核美紛綸不羨五侯鯖宴罷復於亭賜上尊珍

品

簫鼓喧闐

翠輦回諸臣猶傍水雲隈

君恩特與窺清秘步少催人入勝來內大臣領臣等編游諸勝

六十年間到上層懸岬疊嶂望中登白頭元
老誇榮遇總是平生得未曾

露檻風窗碧一圍珠簾斜捲瀑爭飛綵衣各
帶烟霞色新向蓬山頂上歸

在藻游魚樂可尋投竿翻愧

主恩深遭逢仰報無涓滴敢動烟波濠上心

是日舉網

得魚

賚予便蕃十載餘今番文綺稱華裾中宵定
有榮光起芸閣新添

御賜書

蒙賜唐宋文辭
及內綺彩箋諸物

名陽書屋詩初編卷三

八

異種知從

上苑栽壓鞍香擁拜

恩迴

鮮藕蒲桃等物
各賜一筐

一般風味人間少親被

堯天雨露來

送同年王萊堂侍御視學中州

稽古之榮那得此諸生北面稱夫子風雨和會天
下中崧高惟嶽澗瀍水此間人物庶且繁經濟文
章雨不訾况復醇儒岨二昆鄒魯淵源一間耳偃
師上蔡亦替人履信平矜道在邇理學昌明五百
年胚光接響承先揆我朝教育謨訓昭四海同

風趨正軌達則睢州窮夏峯醞釀瀛洛淪肌髓此
方學者莫或先得士如斯斯可矣君操玉尺過通
都輶車所向多梗梓好賢應須投館餐革薄行將
化溱洧文字區區何足云風俗當從學校始

送團冠霞赴中州學使幕

黃葉聲中路依人忽此行七年曾久別千里又端
征雁唳離亭酒驢鳴野店更此間名蹟好且去訪
侯生

南北馳驅日天中始問津荒臺梁苑客坏土建安
人莫道風流盡還看英妙新冰衡能造士樂共賞

音頻

送沈歸愚學士假旋兼柬吳中諸同學

晚歲成名天不薄七載書生筮綸閣名士傳呼徹
禁廷御燭宮壺日酬酢恩榮恰自讀書來姬嬴以
上窺墳索漢興唐降派別分老眼無花真不錯只
今健筆九州橫巧度金針開索籥短檠何曾棄白
頭細字寒宵對斟酌高位居然擁八騶虛心尚爾
研七畧 聖明勸學兼勸忠流覽篇章至情躍知
君不是憶鱸魚霜露松楸心惕惕 乃祖乃父期
待深大雅扶輪欣有托鸞書鳳綉汝往哉駟馬三

槐增式廓僂指江鄉隔幾時同學才人仍瀟落酒
後頻添瑁璫悲花前轉覺情懷惡芙蓉歲歲怨東
風破帽青衫捲秋籜噴噴遭逢說沈公歸而求之
讀書樂

友人齋頭四咏依韻和之

破窗

不乏綢繆計緣何入眼空無端生罅漏漫爾說玲
瓏雲斂光穿碧燈搖燼墜紅只餘三夏好透得滿
牀風

破書

夕陽書屋詩初編卷三

十

先世遺編在傳來有歲年零星難辨帙刊落亂題
籤未許當風檢猶防觸手穿此中多錯悞戒爾慎
烏焉

破硯

剗缺成何物難言潑墨良僅存雙眼滴正恐一田
荒似璧猶嫌補如珪不見方君苗非顧惜焚矣莫
商量

破琴

正擬彈新曲孤桐質不全幾曾因嬰底何處聽鳴
泉似向無中悟將從從誤裏傳殊公還寄語猶有十

三弦

劉蘭谷給諫分巡洮岷

同官日下說鄉關君才十倍見本原讀萬卷書萬里路峻塗直上天漫漫當今 聖人重邊吏黃門簡在溫綸頒銜命震動凜不宿蕭蕭馬鳴車班班岷山之西桓水北編氓雜處羌戎間忠信慈惠兼駿肅絕域敢道書生孱吁嗟乎絕域敢道書生孱虎頭燕頤亦儒冠繡衣行部海風寒

送陳濂村祠部 予告歸里

曾向蓬萊認淺深一官中外歷升沉衰齡早引微

名陽書屋詩初編卷三

十一

臣分去國偏縈

聖主心未到沅湘塞杜若

曾辭湖南

學使之命

轉於風雨樂朋簪容臺掌故君須記郎署更

番有 玉音

從茲洛社賦閑居瀟灑聊乘下澤車夢裏關山馳

蜀道

謂長君

醉鄉風月愛吾廬汪洋千頃襟期合

黃北平

騷雅更番欬吐餘

午亭相公

只有

君恩拋不

得秋菘春韭一躊躇

張擇端清明上河圖臨本歌爲武砥中給諫

賦

此本曾入鈐山堂婁東中丞貽禍殃又聞遺命昭

烟戒不寶異物惟銅梁從來玩好皆瘡痍珍藏什
襲非爲美况此雲烟過眼空人弓人得等閒耳張
生落筆巧而工亘人寸馬俱織濃城郭廣袤市廛
富士女闈咽冠蓋重其中變化無終極絲絲縷縷
貫於一竭來萬戶與千門只在盈尋復盈尺天水
盛時四海家孟老東京紀夢華美食豐衣誇富貴
燕姬趙女競豪華當年若有太初輩憂盛危明儼
官位珠玉錦繡且莫陳雨露桑麻斯上瑞花石網
從何處來金戈鐵馬胡爲哉傷心耆舊空歎息誰
是宣和宰相才何必流連到此本太平粉飾真堪
哂更有桂子荷花召亂根君不見吳山頂上畫中
人

雲錦石屏歌爲陸宏山孝廉賦

有明三百年文章成宏諸老來堂堂知古知今陸
文裕邵儲錢顧參翱翔網羅舊聞收放佚紀記時
事無遺忘二十三家足不朽

見公集

更將餘技揮縑

緗鷗波戲鴻兩陵壓平原北海爭顏頰欲往從之
生也晚空抱遺編禮瓣香京華邂逅遇孫子貽我
新詩比七襄奕葉清芬猶載德摩挲手澤覲羹牆
含雲過雨屏風巧光怪時出琴書旁吁嗟乎江東

挿架何琳琅
集中有江東 觀羣屑公所藏
藏書目錄 釣州

之缸崑山石當年誥誠曾周詳只今玩好萍飄揚
茲屏仍見魯靈光繩其祖武須努力文章聲價不
淪亡

題戴蔚崖小照

不履不衫標格無拘無礙扁舟欲尋剡曲佳處且
問樵夫渡頭

一任吳頭楚尾幾番細雨斜風莫嫌水遠天遠收
入詩筒釣筒

題吳濂州比部中隱草堂

名陽書屋詩初編卷三

三

江上草堂開幽人寄游釣潮聲自去來山勢莽奔
峭無煩濟勝具跬步即員嶠展卷獲新詩澄懷託
辟寮

三山指顧中雲烟紛萬狀好景落君手園亭愜清
曠位置總天然樸斲無用壯素心待羊求停舟一
相訪

鐘聲白雲間漁唱烟波裏世味那復縈吾心澹如
此回首侍承明標格重梗梓豈敢戀江湖士各有
志耳

喜蔡芳三得學錄

卅年文采動江湄入雜聲華衆口推老至名方書
澹墨霎時官已拜人師君鄉薦甫三月迴翔上舍談經地
點竄東京復古詩珍重中郎須記取爨桐莫任賞
音遲

何履菴同年八十

天街踏遍滿鞦韆塵旅食京華六十春博雅早探周
石鼓文章晚達漢平津君丁卯入北闈庚子始受知海寧陳公壘鹽

冷署貧非病風雨寒燈老更親獨喜年來瑤珥盛
頻沾湯餅到同人君六十外連舉子

夢裏湖山客裏家宦游何異走天涯田無負郭歸

夕陽書屋詩初編卷三

十四

期渺賦有登樓旅望賒茵溷并沉徒爾爾雞蟲得
失亦此些些乃公閱世原非淺冷煖由他一笑譁
神清貌古等臞仙車馬時過地自偏懶向人前分
黑白每從酒後說開天名流想像題襟日高位依
稀贈縞年乘興不嫌霜鬢滿黃花猶插帽簷邊

懷俞仲光

廿年京雒滿緇塵良友迢遙隔遠春雞助功名成
底物君以廣文罷歸牛腰著作總陳人謂興之雪樵湘靈揆席諸君殘

山剩水淒涼向鋤月焚香自在身贏得老來清興

好傳家有子不妨貧君別後得子

林壑心情調不孤足音三徑未全蕪
墻頭濁酒來詩老謂輪長門外烟波滿
釣徒自可放懷同嘯咏何妨混跡托鷗鳧
觚稜回首天涯路黃紫楓丹信到無

雪霽張西銘宗卿招同虛船白山次風繩菴

禹門以寧集飲寓齋時丁卯嘉平十有七

日

雪意連朝滿謝庭
鵠來浩蕩遍郊垌
田家尚望三番白
簾外旋開一角青
隱隱嵐光浮遠岫
濛濛烟樹認前汀
清談煮茗詞人事
對此醇醪肯獨醒

是日

夕陽書屋詩初編卷三

五

飲滄酒
劇佳

寓齋高敞俯塵寰折柬來從水石灣
終歲大都如此少八騶難得似公閑

適詢清恪公遺

集入座狂言未可刪上下寒光天一色
冰輪歸擁

馬蹄間

歲暮分詠得門神四首

彈指流年換天街藻績紛頓開新面目
旋失故將軍碩大中無有莊嚴貌不羣
兒童欣栩栩顧盼起風雲

脂粉寧嫌污韜鈴豈是真一朝憑戶牖
遂爾隔風

塵漫刺何爲者蕭郎已路人無端空剝啄來往亦
酸辛

暮暮朝朝見冠裳劍珮俱看人行揖讓

禮記揖讓入門何

術卻穿窬翻覆驚羅雀炎涼及屋烏一年風景別
消息到君無

莫道依王謝烏衣已夕陽衰遲憂剝落風雨獨傍
徨空羨一囊飽誰憐半面粉桃符勿相誚同爾廁
門墻

除夕寫懷四首

物候頻驚歲月遷曉鐘未動尚丁年

借

宦游敢道

夕陽書屋詩初編卷三

十六

人門美餐素深慚雨露偏願豈能如聊止足詩無
可祭且吟研輶車準待行春去銜命依然尺五天

時奉命
巡視通漕

君恩那復戀江莼廿載依光齒近臣覽鏡不堪更

甲子過庭猶自憶庚申

五年乞假省覲
今又忽忽八載

書來矍鑠

曾加飯夢去迷茫也識津歲歲南枝春信早梅花
應笑未歸人

平生難忘是賡酬除夕論詩興自通篋底尚存冰

雪向故人已返鳳麟洲晨星落落今猶昔霖雨濛

濛春復秋

年來舊雨率多下
世及散往四方者

多少離愁拋不得無

端棖觸到心頭

釣遊彷彿記童心逝水年華思不禁漫被賓朋呼
執友喜從讌會得鄉音

是夕招集新安吳陵諸同人

尊前行衍

粉榆社座上翩翩翰墨林但使多才推後起不嫌
霜雪點朝簪

戊辰歲首偶成

和阮裴園同用楊大宇歲除韻

椒酒禁寒倒玉觥東風已向馬頭生宦情不改芸

臺舊官職仍兼御史行

時東城差竣復有潞河之命

春到千門

初進帖歲逢元日例通名京華廿載心如水撚得
吟髭斷幾莖

名陽書齋詩初編卷三

十七

荏苒流光強半過那堪問學任蹉跎三冬原未拋
文史一日何曾廢嘯歌銜似移山遷處少愁如赴
壑到時多終年鹿鹿今伊始瞥眼暄涼奈若何

詩壇結習自因仍壯阮南楊總服膺闕律莫教風
力減逢場又見歲華增旛隨兒女狂猶昔鵲噪階
除喜可徵日者漫推新運好釵頭已綴去年燈

駑鈍何當樂便安東華破曉慣侵寒三千驛路庭
闈遠咫尺輶軒職守寬節屆初陽思雨露詩陳七
月補艱難

將輪進經史

朝天珂馬年年事疊鼓喧闐聽

未闌

輓唐次衣前輩

也曾文采動長楊
珥筆雄開翰墨場
十載清風如杜牧

君刺湖州以慈惠廉靜得名

幾番宦跡滯馮唐

君以郎官出守復以

守調部用

蓬萊深淺資談詭
詩酒淋漓見老蒼
猶記城西舊遊地
重過那不淚沾裳

君寓高陽舊墅極水木之勝

送前輩馬遜渚給諫扈從東巡

齊魯山青入畫圖

翠華東幸擁簪裾
風裁久著

論思地法從還陪
警蹕餘到此真知
天下小平生
纔見聖人居廟堂
自有光明燭
鄭監無煩馬馮書

題熊孝眼先生傳後即呈大廷尉悔齋前輩

名陽書屋詩編卷三

六

梅尉山頭戰火紅
黃巾四出聲交訐
書生慷慨陳大義
不憚口舌爲摧鋒
舌在終無益
有子能捍敵
天地起悲風
但見刀痕赤
刀光落處目光飛
尚戀嚴親涕淚垂
精靈一霎游泉路
彷彿忠臣義士相
追隨
忠孝原一脉
誠至斯能格給事
千載生茗甌
護魂魄
魂魄歸來絕復蘇
鄉人驚見血模糊
箒巢已掃庭闈聚
純孝何嫌毀髮膚
吁嗟乎
去眼代親死
留眼奉親存
誰似先生雙眼網
常繫至今神光炯
炯照乾坤

九月望日由潞河挈眷南歸述懷二首

薄宦於今十九年因循歲月逼華顛鄉心早逐催
歸鳥客路旋開下水船春韭秋菘貧裏味清泉白
石靜中緣黃花驛路瀟瀟雨回首觚稜一惘然
白雲深處見親廬矍鑠行將慰起居手板暫拋真
灑落頭銜未換任軒渠歸裝狹小曾無石家具零
星僅有書爲語鄉人須記取依然風味是樵漁

題家慰山別駕錦江春色圖即以誌別

酌君以郢竹醑醖之酒贈君以碧雞花樣之箋惜
不共聽猿聲之十二爭教獨行鳥道之三千嫩蕊
穠花綺麗疎烟澹靄流連戴君恩而叱王尊之馭
念親老而誦束皙之篇余亦從茲逝矣相期於吹
簫明月廿四橋邊

紫閣感舊示涵齋

少小追隨大父行曾從花下醉千觴微雲疎雨來
詩老澹月輕風帶草堂天上玉樓多辟名

謂鶴潭
東野槐

江諸
先生

眼中金谷半滄桑今宵共爾談疇昔紹述弓

裘未可忘

里居詠懷六首

屺岵常相憶曰歸慰二親似聞猶崛強乍見惜風
塵遺忘增多感悲歡待細論老妻躬縷切不復問

饗人

鄰曲分攜久相逢
眼倍明兒童怪鬚髮
婦媪信平生
歲不慳魚稻家
誰足鼎鑿希文風
未遠惆悵幾多情

清陰遙借樹流水
暗通畦風至身疑
此人稀巷在西
三間仍老屋二頃
乏耕犁贏得初時
燕飛來故故低

矻矻奚為者依然
老蠹魚物難移
我好官已看人除
垣中已三易人矣
婚嫁談何易
粉榆願復虛
擬返新安未果
知勞問訊可有
俸錢餘

夕陽書屋詩初編卷三

二

襍被平生慣今茲
罷遠游山曾收檻
外帆不下吳頭
友人邀游蘇杭未赴過江山色只平山一眺耳
舊雨還分席
新茶早聚甌
穀雨前一日於行葦環溪為詩會
落花時節好
櫻筍足勾留

廿載扈鳴鑾難忘
主德寬身猶臥烟
雨夢已渡桑乾
畫角邊關肅
時幸木蘭
駕清輝殿閣寒
奚童音漸

改猶自說長安

影園 黎美周咏黃牡丹狀元處

花以名流重園因
韻事傳牛腰詞賦
夥驢背市朝遷
剝水橋邊路殘
陽柳岸船館餐
人不朽置驛比

當年

題邊頤公葦間書屋圖

潑墨圖中題句工但願一識邊頤公南北迢遙隔
烟水不獲淋漓詩酒相過從聞君小隱清淮曲萬
壑烟雲滿其腹况當楚地歌楚風愛聽秋聲葦間
屋葦間禽鳥媚清漣誰於飲啄得其天髯翁墨妙
秋毫顛筆所未到神往焉紀與昭也無間然吁嗟
乎眼中之才詎止此水南風雅今已矣憔悴周白
程尊共拍張那復賞音到焦尾君今白髮已盈頭
抑塞冷落橫九州高堂素壁稱知己無那俱從畫
裏求

夕陽書屋詩初編卷三

三

尊江招同周白民邊頤公晚甘園觀芍藥

家園紅藥自年年今年得共花間酒况是翩然舊
雨來此番莫任杯停手憶昔京都艷此花花間日
逐城南藪豪家爭買擔頭春豐臺翻自成鳥有從
來圖譜說揚州淮陰種類曾無忸綽約橫陳燦綺
霞丰茸錯雜連區畝吾弟幾度上長安江鄉回首
夢朱闌無復羊求攜手至空使園亭借客看人生
聚散本無端小住爲佳春正殘滿鞦韆塵土尋花市
何如千枝萬朶來珊珊金帶圍玉帶白一旦遭逢
價千百非花瑞人人重花茲園待爾增顏色

西門觀落日歌

丁未下第留京師澧南繆公屢侍談讌爲述
居鄉時與姚君西夢黃君儀逋爲郊外之游
每夕陽在山紅紫萬狀則徘徊不能去有西
門觀落日歌今忽忽數十年矣余請公詩讀
之而猝不可得昨檢餘園鈔本亦復不見此
詩佳句遺佚古今同慨已已假歸西郊縱步
返照入林偶憶公言漫成長句非敢僭擬公
詩亦非專咏落日語云對此茫茫百端文集
余亦同此情也

夕陽書屋詩初編卷三

三

秋卿下直談鋒起爲溯江鄉林壑美西郊一帶足
徜徉日落未落光銜水此間知己三兩人鋪茵藉
草笑言真浩歌一曲寫胸臆白日已匿天無痕一
自驅馳事京國天門日射觚稜赤舊游回首總茫
然不見當時苦吟客酒酣迫欲把公詩殘膏剩馥
亡其辭我亦緇塵三十載日車難駐流光馳歸來
迤邐西郊路彷彿仙翁吟眺處姚黃一輩逐飄風
獨立蒼茫烟景暮

胡半山招集東園同陳授衣許江門徐社山

各賦五言古

舟泛一雨後涼氣生空濛園林愜幽賞澹澹秋雲
中湖上簫鼓寂市聲無復訂樂此文字飲兼得真
味同躋攀饒勝概俯仰來清風何必誇平山茲足
支吟筇良會展談詭豁然開心胸少焉理歸櫂修
月挂高桐

再賦七絕四首

廿年清夢憶揚州楊柳春風起掉謳今日重尋釣
游處荷花菱葉古溪頭

佳時難忘是秋容瀟灑襟懷取次逢不道軟紅塵
土客僧寮纔聽一聲鐘

夕陽書屋詩初編卷三

三

踏屐登臨興不慳嵐光恰在有無間何時一擢橫
秋去臥看江南雨後山

陰朗難教氣候同無端涼燠霎時中昨宵猛雨判
花盡羸得新開月一弓

奉使濟寧出都口號

詔旨遙從嵩洛頒

時上巡幸中岳

君言不宿一開顏

此番靡愛前驅寵愛接風流李杜間

駐節二公游讌之地

過景州魏師里第席間賦呈

瀛海兩度瞻

鑾輅白髮老臣膺眷注樞迎道左

倩兒扶博得

天顏屢回顧賜環賜額兼賜詩文

綺輝煌照行路四十服官七十休封疆數歷皆異
數經綸不藉聲色動謠詠惟憑操守固 三朝寵
遇久逾隆陽德方亨消翳霧只今林下老尚書臭
味依然是儒素春風到處荷陶甄釋躁平矜聽咳
吐仕宦孤立是安身走佩師言凜跬步閑中歲月
一事無白酒可筭詩可賦幾時杖履得從公任他
冠蓋紛來去

南池

時新建杜文貞公祠以許主簿配

奎藻傳詩史南池俎豆新一杯泛秋雨千載附明
裡徙倚仙蹤近 太白樓相去咫尺 迴環水態真枯腸搜未

多陽書屋詩初編卷三

雷

得慚愧上頭人

太白樓

白也名天下茲爲狂客留豪情溢杯酒仙骨傲滄
洲萬戶烟中出千帆檻外收何須攜謝眺呼吸一
登樓

留侯墓

韓亡方佐漢功退願封留去就無慙德君臣有密
謀只因園共綺幾令呂爲劉地下逢平勃應嫌智
未周

西楚霸王墓下作

如此英雄一抔土民到於今惜西楚危難更番脫
沛公汝不負人人負汝玉斗撞碎怒且瞋漢中一
着非謀臣遂令仗義執言者乃是貪財好色人阮
卒屠嬰雖失計咸陽一火照天地雪恥除兇報六
王長者名偏歸赤帝形勢已失霸圖空楚漢從此
分雌雄魯公之葬亦草草頓忘俎上釋而翁差強
人意惟本紀大書特書君不死啞啞叱咤千載生
風雲變色波濤起江東子弟不重來楚歌四面安
在哉芳草虞兮呼欲出一縷香魂傍夜臺

東阿弔曹子建

名陽書屋詩初編卷三

三

任城去後又東阿煮豆燃箕奈若何不信忌才因
八斗風流端爲感甄多

戚城

三尺俄成赤帝功野雞飛入咸陽宮定陶美人舞
未終長陵那得聞歌春母愛子抱一旦空當年悔
不死相從多情猶自說重瞳虞兮廟食大江東化
爲香草遍山紅年年歲歲嬌春風慷慨愧彼巾幗
雄戚城終古泣寒蟲百年憤洩惟樊崇代邸母配
隆準公報施誰謂天夢夢

題汪箕臺觀察小照

卅年結習傍騷壇冰雪詩篇屬和難落葉秋風驢背穩吟情仍否憶長安

興來獨往意如何秋晚江南紅樹多不道清香凝畫戟依然風味托烟蘿

德州晤田在田同年

脂秣連朝倦客裝下車先問小山薑新詩瀟洒微情性禿筆淋漓見老蒼自是論交多錯迕曩官京師於君獨未相值誰知使事亦倉皇漁洋往矣嗟翻覆西圃依然有瓣香時共談漁洋身後之事感慨係之

司農兩度蒞南州宏長風流紀勝游到處真能來

夕陽書屋詩芻編卷三

五

國士至今人尚說仙舟

誰知夜半仙舟上相對停燈待布衣黃仙裳記公學

使時事也

庭間老樹餘蒼色杖底文孫已白頭

扶我樞迎似杖

長司農句載展衣冠因我出爐烟茗椀一淹留

山薑書屋夜話

鼎彝圖史足安排可是當時畫扇齋

書屋爲德水舊齋蒙叟松

圓俱曾下榻於此

俊及聲名曾幾輩雲霄意氣又吾儕杯

浮冰雪風生腋

是日雪酒餉客煮茗亦係雪水

徑轉松篁月滿懷

喜接高談忘漏永任教踪跡各天涯

時與椒園分路

題汪氏五世讀書園圖

五世卜其昌縹緗澤不忘樓臺依水石歌咏雜松

簞董相無窺圃康成可立鄉通經知足用屏翰績
方長

平原懷古

誰道平原好士也十九人中毛遂下功成方得識
先生不比夷門抱關者只因昌谷數篇詩千載推
尊無異詞美人何辜覽何幸剛狠狼藉空爾爲我
欲點竄繡絲句有酒惟澆信陵墓驅馬平原一喟
然虛聲從古紛紛誤

不識真卿作何狀一朝捍敵危城上二十四郡一
忠臣朕不知人枉惆悵四朝清德八十餘太師大

名陽書屋詩初編卷三

毛

國徒區區置之死地曾不惜唐家天子嗟何愚不
死祿山死盧杞奸臣藉手希烈耳宣諭魏博韓愈
生胡不慙遺顏真卿

正月二十六日旅館悼長女

是日爲
女生辰

嗟汝方而立黃泉已十霜病曾因藥悞死不見兒
殤孤枕宵偏永殘燈夢未長那堪風雪湧旅館倍
淒涼

安德迎鑾大風雪歌

長河以北狂風吼六出飛花大如手皇華驛路不
見春栗烈餘威詫黃耆寒肌生粟裘不溫堅冰凝

結流漸走五更催起治行裝晦黑漫漫失星斗馳
驅王事敢言勞凍到鬚髯皸指拇相逢那得話便
便瑟縮幾如箝在口土炕茆檐即當歸遑問烹茶
亟沽酒周廬環衛盡公卿競說春寒未曾有臣之
壯也已不知如何況始衰見蒲柳須臾屏息 至尊
來一派和風徹林藪樞迎道左覲 天顏封疆屏
翰交前後鞭梢遙指識姓名 敕教旋軫親職守
翠華從此一程程心逐南鴻拜稽首江上梅花寒
更佳留待 六龍君知否

晚宿楊莊閘

夕陽書屋詩初編卷三

三

八里又逢閘孤烟傍水涯河聲趨石健人語挾風
譁夜永裘知敝春寒樹不花計程餘幾日涉上已
如家

泉林寺

相傳子在川上處

六龍曾此一經過奎藻千秋澤不磨入寺早聞清
響激憑軒全受綠陰多稱先尚有縑流在

老衲入十餘能

言廟時事

悟道其如逝者何半晌頓教纏縛去擬將

四大伴維摩

泗水道中

亂山晴翠點征衣愛此蕭疎樹幾圍水繞尼防清

且列地傳舜跡是耶非烏披殘照衝波去僧逐流
泉取逕歸道上泉聲不絕咫尺會心應不遠今宵暫爾息
塵機

韓莊閘見月

三旬悵其陰今宵始見月舳艫銜尾來邪許聲不
絕倚船挹清輝千里如可掇甕社擁明珠茲夕光
逾潔激灑湖水明浩蕩 聖情悅江南歷幾程處

處瞻銀闕

聞大駕將至高郵

涉上立春

那堪簫鼓鬧征人積雪當春未見春霧氣全昏亭

多陽書屋詩初編卷三

五九

四面

是日早大霧

愁懷聊借酒三巡

席州牧饋酒

土膏到處

欣草甲芻豆連檣見苦辛

山東州縣派運草料

望幸心情如

望歲和風早淨六街塵

沈荻林觀察話別

輶車分道已三秋

戊辰余與君分視南北漕

候館重逢話別愁

名士偏教留海上詩篇端合壓池頭

君新任城南池

官

無長物仍豪舉鏡改初顏尚冥搜雨雪連朝情轉

洽那堪轍跡又東游

曲阜懷孔岸堂先生兼題桃花扇後

斜風細雨魯西門嘯志歌懷信史存縱有鬚眉同

鬼蜮尚留正氣滿乾坤烏衣翠袖興亡恨負鼓吹
簫涕淚痕不用隔江悲玉樹石頭從古出降幡

讀湖海集有感

岸堂佐治下河往來吾州文酒之讌殆無虛
日其載於集中者置鄭莊之驛分鮑叔之金
姓名纍纍可覆按也延至於今此調不彈風
流頓盡豈時會使然乎亦人心之不古若也
爰賦長句感慨係之

當年風雅盛吳陵掀髯快讀湖海集東魯博士視
河來身是軒裳心箝笠從來競說詩人窮猶未一

夕陽書屋詩初編卷三

三

官徒壁立紛紛好事得諸公刻意憐才真汲汲不
將游戲混檮蒲幾曾裘馬矜蹠躐花前唱和倒金
尊宿至慷慨擔玉粒適館授餐春復秋青芻白飯
維兼縻更有妙舞與清歌紅牙女部歡情洽酒痕
墨瀋幾何年說來尚自香生頰先生冷官非熱官
此番舉動殊不測願將軼事諗時流莫謂古今不
相及桑梓流風則不遠北海之樽南州榻

南旺故人

百里看行半烟波又一村湖光白到枕山影翠當
門點點春帆亂囂囂魚市喧故人家就此剝啄早

相存

湖上歌

湖光兩道穿窗牖

昭陽獨山之間

放鴨船邊見田叟田叟

蕭蕭白髮垂曝背迎暄樂南畝問渠住此幾何年
子已生男孫娶婦衣食宛轉寄湖中螿蛤魚蝦菱
芡藕榔聲擄聲到枕簟山耶雲耶壓杯酒勤勞穩
作太平民况復寬大無鞭柵昨日州符下捉船芻
豆連檣吏哮吼漁舟淺陋人所棄墮突不至村前
後一葦杭之水中央其魚維鱖貫之柳陶然不問
舟遠近醒來歷歷見星斗官船打鼓起鳧鷖夾岸
旌旗驚老醜 聖朝自是諫書稀下情亦得陳矇
眛願公佐此堯舜時膏澤頻煩歌大有低頭抑塞
愧斯言急趁風帆前渡口

南池留別河帥顧用方先生

覲面成知己相從彌見真 三朝遺矩在八座典
衣頻投轄無虛日屬橐仰後塵一般勞拂拭欲別
轉遂巡

瀟洒無官樣常來坐月圓憑軒貪看水覘脉暗通
泉花柳開新徑烟波狎小船風帆明日挂已落女
牆邊

王他山司馬以小舟見貽月下偶泛率爾成
詩

半畝方塘水烟波舊釣人不嫌舟似紙且喜月隨身
楊柳陰邊路鷗鳧雨後春王郎真解事贈我碧
粼粼

駐節東昌懷家禊亭副使

魯守此郡

聊攝今宵憇旅思髯翁曾此出麾時雙幡未改平生
志廿載猶懷衆母慈髮髮嬉游門巷古錢刀充
物市屢資星軫到處毫無補慚愧諸君負弩馳

臨清弔四溟山人

夕陽書屋詩初編卷三

三

七子登壇競鼓旗褐衣清廟眇翁詩於今風雅傳
香巷到處琵琶譜竹枝闌闌淒涼歸賈日沅湘慟
哭救盧時千秋高誼成終始那借區區貴介爲

題吳冠山樂閑圖

星霜成久別風度憶當年偶摘田盤句
薦同參清
淨禪碁聲修竹裏
君齋名竹適
山色枕函邊二仲如相

訪門前放鴨船

五里篁南路

余家距君五里

清風遠市囂疎鐘黃葉寺春
水綠楊橋囊底新詩本擔頭舊酒瓢名山終有托

端不遜烟霄

喜馬嶓谷見過即送南歸

今朝靈鵲噪喜得馬卿來欬吐驚人句山川濟勝
才青燈憐舊雨白髮泥深杯正爾攄離緒歸期且
緩催

同是天涯客鄉關觸念深衝寒游子路對雨弟兄

心

謂令弟半查雅調輸嬰谷清風愛竹林

謂玉井竹町諸君及香溪

太史相思憑問訊莫靳北來音

同年毛約菴侍御七十

榜前成邂逅先後出師門

君丙午受知鄞縣夫子

嬰谷淵源

合風霜氣節存西州今昔路南浦別離尊七十流

夕陽書屋詩初編卷三

三

光駛相違隔語言

通籍仍儒素高風未可尋獨能行古道真不負初
心細字挑燈暗疲驢踏雪深一生勤苦志耿耿到
於今

升沉應莫問公論亦徒然方謂虛前席何當困左
遷烟霄看袞袞華髮已年年長物夫何有空教腹
笥便

老未疎鉛槧誰云吾道窮不嫌花樣古爭羨斲輪

工

君掌教虞山

山水琴聲裏風騷酒棧中庭間衣鉢好

又見小毛公

謂令似宣夔庶常

夕陽書屋詩初編卷三終

夕陽書屋詩初編卷三

三十四

夕陽書屋詩初編卷四

海陽程盛修 風沂

題朱爽亭太守平苗圖

君曾熟讀陰符經，慷慨說劍兼談兵。一麾遠作泮
阿守，苗獍狉狉恣縱橫。儒生馳驅萬里外，一線千
盤知要害。毒霧腥風總不辭，扼吭斷臂方攸賴。况
茲九股更凶殘，攻剽格鬪性所安。虎狼跳盪猿猱
捷，服心爲上古來難噫吁嘻。生長江南樂烟水，一
邱一壑風日美。君獨何爲至於此，此番可以訓臣
子。介子功名偉丈夫，伏波勲業世間無。玉關生入
亦偶耳，老於牖下胡爲乎。君不見平苗圖

題戴潤山滇遊圖

圖用山從人面起
雲向馬頭生詩意

我生欲行萬里路，弱水扶桑渺雲霧。滇南聞亦好
山川，金馬碧雞莽回互。極目蒼烟半壁天，芙蓉秀
挿鳴泉注。廿年東華踏軟紅，齊魯燕趙頻來去。江
鄉回首思茫茫，一髮青山腸斷處。那不輸君汗漫
游，披行看子情如訴。帽影鞭絲策蹇來，好景如攜
謫仙句。黃山峯聳最高峯，丹崖翠壁紛無數。腳底
平鋪起亂雲，頂上懸流飛瀑布。歸而求之咫尺間，
襍被囊琴隨所遇。夕陽馬首何爲乎，從前我亦雄

心誤三岔驛裏待君還短亭流水長亭樹

升菴句

洪潤峯林士偉堂竹林招遊湖上兼到平山

法海諸勝

蟬鳴高柳間舟放新雨後當暑無炎歎涼意生衫
袖三載軟紅人此景難邂逅素心得儔侶招邀情
太厚移樽就蕩花香藉微風透十步五步中亭臺
紛錯繡乘興陟彼岡蔚然見深秀無復曩規模競
翻新結構惟有江南山數點青依舊長揖起歐蘇
天語褒賢守不朽在文章繁華空雜糅吟眺愧草
草應待秋來又

夕陽書屋詩初編卷四

二

家禊亭副使話舊

華髮相逢話舊緣離情繾綣溯當年 皇都烟柳
題襟日野寺疎鐘聽雨天早賦遂初真灑落獨能
濟勝樂輕便白公入雒歐公穎總讓先生一著先

題朱鶴年運甓圖

捉麈清談王夷甫超超元箸推典午天下蒼生究
何補八州都督長沙公不尚浮虛真英雄大勳反
手勤勞中須知此日足可惜萬里烟霄休寂寂且
向齋頭來運甓

題張天衢松陰放鶴圖

不道丞哉苦清修與鶴同一船聞白傳二頃說蘇
公暮景飛騰裏家山徙倚中自來寥廓士那得任
樊籠

振翮無拘束天光四面開影衝殘照去聲與遠風
回瀟灑亭臯下蒼涼水石隈巴童應狎我他日訪
君來

用和
靖事

題張翼雲看劍引杯圖

長劍倚天壯夫志匣底干將猶未試寶光熊熊早
懾人銜杯振觸胸中事方今四海無戈鋌談笑從
容致高位英雄那有不平鳴無由照見春坊字玉
瓊金鐔且置之好窺墳索抽經笥漢書下酒彼何
如學劍不成還學書

題張蘭臯秋郊牧馬圖

六幅蒲帆一篙水吳兒生長烟波裏何人得似張
公子渥洼汗血本名駒神駿由來鑒別殊五陵年
少徒區區秋風首藉高原土滄海流沙隨所向駟
驢猶帶書生樣

唐漁訪秋魁志喜

卅年文采動宮牆梨棗爭傳翰墨光

君有歷試
草閱世幾

度荒江空寂寞今番遠路慶高翔前茅宛列三珠

樹後起親承一瓣香君爲王君雪樵高弟兒子漫馳京雒譽也隨秋鷄共飛揚

得大兒嗣表京兆捷音寄呈孫合河夫子

古來難副是科名兩世恩叨藻鑑精霖雨沙堤新

座主公以協揆主試春風楊柳舊門生菁華已拜先資獻

蒼翠還期晚節成是科松柏命題與庚子南闈暗合函文重開提

命在一般温飽不關情

翁霽堂見過

剝啄無聲客到門形容未變語音存非關丹井滋

顏色自有青山入夢魂君有三十三山草堂小照日月催人詩

夕韻書屋詩初編卷四 四

格老江湖浪跡布衣尊平生二叟同肝鬲眼底升

沉總莫論謂歸愚芳三二君

殷贅亭司訓歸里

先生八十賦歸與問字門多拜筍輿雞肋已拋官

裏日樂天詩從前歲月屬官家蠅頭曾著老來書酒逢京口筍

初熟山入南徐畫不如雨笠風襟朋舊在莫嫌剝

啄早相於

喜晤張汝望前輩海房子

第三廳後未追從車笠曾忘舊日蹤長夜對眠高

閣雨百年懷古祇園松公車時假寓慈仁寺詞臣建白楓山

懋世廟時曾奉詔陳言碑板流傳北海邕賢子只今思手澤
遺編商確樂從容

春日雜感

梅花香夢宿綠慳載酒詞人畫舸還鄧尉幾番辜
舊約那堪淪約又平山元墓之游不果昨擬踐約平山復以事阻未赴

山紅澗碧故鄉情愛聽黃鸝雨後聲一自捉將官
裏去廿年虛負幾清明

九十春光已半陰花間消息尚沉沉縱然不外凡
桃李也自添人惆悵心

花甲平頭事事非故家松柏已成圍二三朋舊空

夕陽書屋詩初編卷四

五

延佇又道春歸人未歸鄉人屢訊歸期

殘牡丹

色空空色悼花王不耐中宵風雨狂照檻輕盈仍
有態傾城穠艷已無香零脂墜粉三分土悴綠啼
紅半面粧富貴何常遲暮至及時早共引杯長

垂柳次韻

腰支婀娜小蠻輕柳宿光中早向榮無復江潭歎
搖落不教桃李占新晴樓心舞到娟娟月陌上啼
殘恰恰鶯萬縷千條渾莫辨也應喚作綠揚城阮亭

句綠揚城

郭是揚州

吳治也贈牡丹報以長歌兼誌舊感

草堂昔日洛陽花清尊絲竹泛流霞謝墩瞥眼非
故物烏衣門巷空咨嗟每於花時一回首郢弓人
得夫何有敝履遺簪情或然不堪轉落他人手

花榭已再
易主矣

昨聞花發說東鄰折簡招邀意氣真雙

眸未遇金篦刮朦朧都作霧中春

高別駕置酒賞
花以目昏未赴

空齋正爾愁寂寂良朋爲我增顏色黑甜一枕夢
初回宛疑身到衆香國暖艷難禁風雨寒呼童早
置赤闌干紅羅障子殷勤護留得天葩取次看主
人愛花花不俗一笑嫣然媚幽獨富貴丰姿迴出

名陽書屋詩初編卷四

六

塵明粧靚飾生華屋對之能不醉顏酡酌君大斗
爲君歌明年此會春明住紅藥晴翻太液波

京師
牡丹

極少以芍
藥代之

夾竹桃

分花布葉總無端也作偎紅倚翠看彼美丰姿原
灼灼此君標格亦珊珊淡粧濃抹迎初旭細雨斜
風起暮寒嘉種遠從京雒至七年相對憑闌干

大雷雨行

癡龍驚起晝不眠震雷虩虩行中天風號雨驟一
路哭棟折榱崩將壓焉蒼茫四顧生愁疾滿目漂

拯救無術黑蛟青蠹到處生戲蝶游蜂匿不出嗷
嗷嗟此一方民頻年水溢海之濱豈有神仙能辟
穀何處松柏堪爲薪廟堂自是光明燭 詔書屢
厯逃亡屋朽索紛綸少府錢連檣絡繹太倉粟堯
水湯旱古有之誰云天數非人爲狂蒙肅聖轉移
事洪範之言不吾欺

雷雨連朝愁心不釋偶檢過江集中有大雷
雨作二首漫次其韻

積潦方嗟畎澮盈迅雷砰磕震來驚田家已失篝
車望鄰曲翻傳屋宇傾水底魚龍多挾勢簷間瓦
缶亦爭鳴五風十雨承平話空憶康衢鼓腹聲
從天金鼓振千軍噴曝飛泉取次分人哭人歌渾
莫辨舍南舍北不相聞更無暑氣虛團扇早有涼
風到練裙伏處未忘憂憫意幾時謀醉月紛紛
畏炎屏跡擬向山房納涼詩以先之即東百

泉

經旬暑雨挾豐隆剝啄頻嫌襪襪翁不有招提涼
似水怎教談笑氣如虹碧梧翠竹風初透清簟疎
簾月可中塵鞅暫拋纏縛去剪蔬端底勝魚熊

送張天衢假旋

泰州同

早年帷帳倚清才小試鉛刀海上來
筆底飛揚真健者
世途憔悴困丞哉
臨岐不忘如飢渴

君去任猶致倦倦
在水行將與溯洄
君居若雷之間
綽有黎民懷

舊德攀轅可受一錢回

三徑蕭疎雀噪門
爐香茗椀趁朝昏
幾番破寂無

官樣恰可侵苔有屐痕
君公餘時相過從
詩法源流開索

籥河渠翻覆認崑崙
君練習河務
白蘋洲畔瀟瀟雨那

得隨君仔細論

留別吳翼堂太史

篁南五里路曾經
剝啄重來戶不扃
松勢遠浮千

夕陽書屋詩初編卷四

尺黛山光全覆一
亭青投閑洛社非
虛願獻賦長

揚總妙齡謂青紆昆仲
正好相從話
蕭瑟那堪歸思促

揚舲

馬鬣難封總暗驚
與君俱營先兆未遇
樽前况復唱離聲
雲

時天遠催人遠
此去山程雜水程
東閣浮雲多變

幻西州輟樂感生平
謂禮闈諸座主及桐城師相
從茲暮景應

珍惜莫點吳霜老
易成

項百原話舊

標格經年憶
項斯流光轉
眼鬢成絲
北蘭說餅尋

僧日南浦呼
船別友時
二語記西江時事
卅載久虛徐孺

榻幾番欲輟渭陽詩君舅氏吳衡寒宵剪燭談曠
長新下世
昔一任歸裝路透遲

贈吳湛若

吳君交游四十載名場微逐親賢豪京雒曾窺諸
老秘馳騁上下窮風騷君於繪事析秋毫聲名未
振歸蓬蒿惜哉不與櫟下漫堂遇空讓耕烟梅壑
爭宕堯畫裏知君得君淺別有會心心自遠入林
已密入山深烟霞萬狀看舒卷酒酣爲我話名山
匡廬泰岱如等閑黃海峯峰叫奇絕飄然五度軒
成間我生亦愛溪山樂愧無濟勝供騰蹕咫尺黃
山未問津何暇夸張到五岳展君畫共君談令人
那不抽朝簪何日芒鞋遂初服踏遍南山之北北
山南請君畫到幽絕處添毫爲我營茆菴

輓唐莪村方伯

一朝踪跡邈山河樓指俱從憂患過禍至大都因
忌起謗興端底是才多世情覆手仍翻手宦海前
波感後波賴有 聖明能普照幾翻詠詠總消磨
立歲登科正及時仕途倚伏怎如斯生前 綸誥
曾三代死後銘旌仍兩司長夜荒雞歸路渺亂山
殘雪訃音遲時新安那堪回首秦關月老淚縷縷

只暗垂

孤寒八百黜銷魂慷慨於今古道存不以遺簪忘
舊雨肯教舉火缺朝飧太初原未營廳事疏廣何
曾計子孫長物一官囊苦澁空留清白荅 君恩
疇昔京華儼舍餘相從何異望衡居朝衫未卸頻
呼酒花徑纔開早命車八座不忘存舊誼卅年猶
是締交初

戊辰冬假歸公開府江西於途次書幣存問二語荅公詩也

黃壚漫

爾成追憶諧笑平生那得如

輓吳成夫觀察

昔年官日下尺素辱相貽明月疎砧夜秋風落葉

夕陽書屋詩初編卷四

十

時玉闕悲定遠流水失鍾期俯仰增蕭瑟空堂有
夢思

鄉評推禮法舊好續姻盟代有臨池跡庭無落子

聲

公庭訓整肅子弟工書外無他嗜好

廿年遂初服一瞬見銘旌那

不傷懷抱淒然別後情

讀腰雪詩有感

記從文社倒芳罇襟上曾餘舊酒痕開卷頓成今

昔恨風流只剩一翁存

霽堂

日車難返去如梭官職聲名竟若何棖觸平生賜

斷處集中惟有祭文多

劉賓客句腰雪交游極廣詩中零落殆盡披閱劉句

益用
愴然

題鍾溪堂江村送客圖

君其爲安道訪者惟子猷亦或是元卿過者惟羊
求山水重且復竹木清而修往來柴門間談笑輕
王侯捉將官裏去歲月空悠悠無復烟霞侶徒嗤
襍穢儔一般清意味付與畫圖收我行返新安攜
圖江上游鍾期呼欲出宛若素心侔暫爾卸纓芾
聊得伴鳧鷖田夫與野老邂逅古溪頭或話桑麻
長或覓林塘幽泉聲來枕簟山影落觥籌吾黨二
三子剝啄欣相投慣客衣不舂茗柯爲小留今番
辭故園烟際下孤舟酒徒忽雲散江水自東流風
帆迴北固彌望平蕪秋何當倩長康點筆畫滄洲
回首叫猿鶴漠漠寒雲愁茲圖久不報枯腸任冥
搜此中有佳趣難與躁心謀

送繆玉叔入都

三歲林居隔

帝閣憑君耆舊一相存文章千古

靈光殿

北平侍郎

桃李更番通德門

漂陽海昌兩相國

可有才

華能薦襴豈無跌宕喜留髧春明坊外依依柳過
此休銷旅客魂

承華請告出 皇都佳話應傳祖帳圖老去尚餘
薑桂性夢回仍傍 袞龍趨青蒲諫草平生在翠
竹江村歲月徂謂竹 自此光陰爲已有秋菘春韭
總堪娛

籍咸相對鬢毛蒼共話尊鱸意味長十載早開松

菊徑翼堂於甲子歸里一帆遙指水雲鄉幾多往事如天

上不盡名山到枕旁白詩有山來枕上獨有鯁生思未熟

仍將珥筆賦長楊

和百泉和上九日述懷韻

未蹈嵇生七不堪漫思彌勒許同龕黃花紫蟹深

名陽書屋詩初編卷四

十三

秋節落日寒鴉古木菴老矣幾曾忘薊北母兮猶

自戀咳南擬赴春明未果懶殘相對殷勤語煨芋還憑事

後參

四海應知鬢未霜重陽幾度滯江鄉瀾漫萬井天

無岸粧點三秋鞠有黃吾鄉連年被水登高一望無際過眼滄桑

空復爾會心魚鳥本相忘輸君瀟灑酬佳節摘得

茱萸禮梵王

俞餘齋依韻見荅再疊前韻報之

離索襟懷正不堪忽聞廟算奏西龕時準夷獻捷元暉詩西龕

收組心同伏驥馳千里身似枯禪臥一菴坡詩僧臥一菴

初白頭 舊雨幾人聯郭北新詩何處寄江南久不得吳中消息
那須搖落增多感老圃秋容仔細參

醉把茱萸又一霜去年此際駐家鄉登臨頓失山
如黛時序偏驚葉再黃容秋九日於故山登高看落葉四海論交

誰好在七言均賦最難忘粃糠漫爾成前導佳句
何曾肯遜王

九月九日繆義圃歸自應州以病謝客詩以

訊之

眼底紛紛說高蹈林下何曾一見之三晉雲山迴
軫日滿城風雨泊船時霜螯頓欲傾家釀秋色依
然抱短籬少藉刀圭應有喜亟須談笑勿教遲

夕陽書屋詩初編卷四

十三

時亮和詩根觸舊事再疊前韻報之兼示應

州并懷玉叔

飄茵隊溷言良是安得排閭一問之愧我因循游
宦日看人瀟洒入山時不辭剝啄來新句未可倉
皇別舊籬余將赴京師消息軟紅憑寄語鱸魚正美勿

歸遲

歲暮書懷次時亮韻

今茲河決雨綿綿妄意媧皇補漏天賑恤 聖心

猶有憾痾瘵 帝德本無愆上屢頒諭旨幾時秭

稻來千里

今歲被災獨徧吳越皆然

不見篝車又四年糜粥從

前稱下策而今安得此高賢

輓魏景州座右

此地曾經幾息騶師門談笑足淹留那堪一掬羊
曇淚眼底西州即景州

笑擲鳩筇喜不勝今番無復檢行滕尚存一息留
無計僅展雙眸語不磨前此謂公情事今番瞪目一視而已

奎藻春風御墨鮮江湖魏闕已多年周廬三度承
天語娛老猶知戀簡編御詩有娛老詢何物三朝有賜書句

記從霜露入乾清矍鑠駕行迤邐行門下晁黃爭

多陽書屋詩初編卷四

十四

撰杖步趨那得及先生

辛未冬公來京祝修與少宰此懷侍公入朝

步履便捷追隨莫及

萬國呼嵩拜

冕旒尚方親賜紫貂裘分明一語

難成讖自別蓬萊未十秋

公陞辭日上召見溫語諭以十年後聖母

萬壽爾尚能來

數椽負郭

九重知無地樓臺魏野詩璇榜若非

夸聖德廳前肯改舊茆茨

公居湫溢近因安奉御書畧為充拓

高風廿載閉門居標格鄉人想像餘一自道旁迎

法駕蒼顏纔識老尚書

仕途孤立足安身祇領師言當佩紳垂老幾曾爲

令僕枉將衣鉢付斯人

烈母胡孺人詩

馮寧劉孝廉有洪之曾祖母獻賊掠湘湖間氏挈孤尋夫

中途遇賊以孤授僕得無恙氏身殉焉

崎嶇戎馬際襁負有孤雛但可存宗祧何當愛髮膚是間收爾骨留面見吾夫

收葬時面如生

泉下應潛慰

孫曾已仕途

戴蔚岩課耕圖

鹿鹿何爲者披圖一爽然畦分新雨足鉏荷遠風便稼穡資勤動篝車樂歲年耦耕思已熟莫道不

知田

夕陽書屋詩初編卷四

五

送鄂韓姪侍祖母就養岷州兼懷尊人九峯

觀察

年少何須說請纓秦關百二奉親行宦成自愜陔華願別久能伸烏鳥情馬上早推磨盾手夢回猶認禁鐘聲

君由中翰外轉

趨庭道我長相憶介子功名徹

帝京

符幼魯七十

居官無俗韻久矣躁心平吐屬皆名理鬚眉逼老更酒邊花月興詩裏薜蘿情競道西湖好無田可

退耕

吟到疎桐句知音有幾人清虛空色相平澹見精神
神命定劉生論文惟杜老真與君期息壤料理水
雲身

丁丑八月二十七日歸岷懷宗伯招同衣園

前輩虞山協揆樹峯司空繩菴少司農檜

門少宗伯白齋少司空集陶然亭次虞山

韻

釋褐從公游此地庚戌會同年於此茲來喜赴一官閑烟

藏古寺苔侵屐路轉荒塍菊繞灣魏野詩重陽菊繞灣雲影

蒼蒼迷遠岫秋風瑟瑟動衰顏着棊校射都無與

夕陽書屋詩初編卷四 六

壹任山僧笑我頑

丁丑九日王萊堂給諫招同墨莊鴻臚補堂

司封松栢菴觀菊用兒裴韻

蘭若招邀野趣長更無風雨攬重陽良朋載酒成

真率佳節簪萸少輩行耕心西上約齋南歸今歲登樓頓少二人望裏

蘆開千點雪客中菊見兩番黃到京又兩度重陽老僧倘

會悠然意異種何須詫遠洋

除夕寓齋同張乾夫大令話舊

今夕歲云徂蕭然旅况虛未能忘 聖澤豈敢賦

閑居椒酒消寒候南烹入饌餘昨朝逢驛使已報

隔年書前一日發家書

好友來天際情懷久益真此番將盡夜同是未歸人五馬初承寵君引見記名太守三方各見春君與余同容京師眷

屬各分前途須努力莫厭老風塵

三月十日王萊堂孫虛舡陳向山李瀛少張

墨莊熊廉村薄補堂招同虞山協揆王園觀海棠即次見投元韻

瀑直餘閑載酒來嫣然一笑曉奩開此間容易瞻風度不是看花不舉杯

海外靈根早擅名兩株穠艷足傾城有香凡卉知

夕陽書屋詩編卷四

七

多少那得娉婷動我情

少陵無意賦春陽上相吟來翰墨香不道花前偏有淚一時撩亂到詩腸是日以眷令圖見示沈瀾久之

花枝照眼憶當時館閣風流共賦詩辛亥拾園館課時海棠盛

開以花枝照眼句還成命題廣陵青陽兩前輩有詩卅載平泉零落盡與君

秉燭莫教遲

輓同年王萊堂都諫

纔過西州傷謝傅謂松泉太宰旋來左掖哭黃門掉頭

一夕成千古瞥眼重泉見兩番薄宦幾曾餘長物

遂初今已付空言花前載酒年年事此後憑誰與

細論

半月間青箱
堂觀海崇

送祠部鍾勵暇同年南歸

容臺十載最知名，手板逢迎渺俗情。
鬱鬱窗前書帶草，康成端不愧經生。

望溪宏獎憶當時，三禮淵源感素知。
眼底又添知

已淚潞河歸旆水，瀾瀾

謂海寧相國

天恩特與饜蓴鱸，自此光陰屬老夫。
白首弟兄風

雨夕憑君寫作對牀圖

時將省令
兄於吳陵

題同年表叔論祠部詩後

雜興儲王語，句工天然真朴遜。
陶公南阡東陌朝

夕陽書屋詩初編卷四

六

朝遍誰是平疇愛遠風

山水清暉靜者知，游心寂寞是吾師。
千年邱壑開生面，只有風流謝客兒。

爲下爲民念在茲，數篇悱惻道州詩。
何人得似袁夫子，說到蒼生只淚垂。

詩格由來郎署高，不教館閣擅風騷。
眼前位置君須記，邂逅儀曹又水曹。

和同年任處臬太守移居

地爲陸放翁
快閣故址

廿載離心託遠鴻，依然寥落感秋蓬。
菟裘早卜才

方健息壤猶存語，不空酒伴淋漓元。
漫叟詩情豪

宕顧逋翁山重水複朝朝遍款段何須羨錦驄
曾否看囊有俸錢一邱一壑儘輕便夕陽流水翻
雅陣細雨斜風放鴨船望裏湖山同罨畫興來揮
灑作雲烟何當邂逅任公子吟到南阡又北阡
從茲快閣認行窩朝夕于焉快若何不信人間春
去早只知此地月明多綠陰巧轉枝頭烏紅掌羣
嬉水面鵝莫任放翁矜獨步也憑湖畔一高歌

送同年吳耕心之寧夏兵備道任

尋花算奕來蕭寺閉口不談天下事一朝奉命單
車行慷慨平生丈夫志丹崖矗矗走名王黃河滾
滾從天際緩帶輕裘足指揮建牙吹角傳精銳
天家指日掃欃槍淨洗甲兵長不試軍儲仍與念
疲勞師行亦得勤撫字 皇心仁愛恤邊氓屏翰
承流宣德意沃野千里古靈州名棠邨雨君其繼
同年顧震滄以經學授少司成 召見稱

旨復膺寵錫索詩爲贈

千佛曾通籍依然理釣緡非官能奪志有母足安
貧稽古忘寒暑殊榮出苦辛一言資拜獻風俗未
還淳

後死心情慘不舒典型凋謝慟何如過江名士搜
羅日宿草師門涕淚餘耄耄忘年呼小友糝糊老
眼辨奇書從茲歷歷昇平話無復尊前接起居

壬寅癸卯間薄遊江楚得詩一冊曰扣舷集
爲族某咨賞攜去移時久而不歸留官京

師廿有餘年不復記憶族某隨即下世詩
亦旋失漫識一首

平生遊歷多吟興三十年前一卷詩不道小時曾
了了更教老至尚孳孳空山落葉鐘邊寺野館穠
花酒外旗太息鍾期今宿草幾回夢憶撚髭時

夕陽書屋詩初編卷四

三

行圍六咏

帳房

作法因天地憑虛亦苟完彌縫資大布舒卷藉長
竿差喜眠餐便何嫌任負難踰溝仍有事風雨得
平安

認旗

千帳渺何從旗幡揭半空標題出新意花樣不雷
同稅駕心先愜弛擔信早通視吾鞭所指那用歎
途窮

行牀

暫爾除榛莽還搢半咫牀寒曾諳北地軀不類東
方聲圓駝喧夢心疑馬脫韁漫漫長夜永能勿九
迴腸

矮桌

停車方授几二尺足光瑩坐以居卑穩詩因抱膝
成淋漓麪從事揮灑楮先生

虞山贈絳
酒松箋

位置無多

子仍須伴短檠

行釜

行行須挈釜平地起炊烟本不因人熱何曾倚竈
權吹噓成頃刻烹飪總輕便待得黃梁熟吾心亦

夕陽書屋詩初編卷四

三

坦然

界繩

此疆并爾界總藉一繩分我馬如歸廐人奴早別
羣編籬亦爾爾越畔莫紛紛空濶來朝路無煩吟
域聞

塞上九日即事柬虞山同年

九日京華說老饕淋漓詩酒興偏豪只今行路虛
佳節上相傳來赤棗糕

晨起披裘午袷衣涼秋天氣少寒威憑誰說與潘
邠老塞上重陽風雨稀

短後登高旅望賒亂山深處渺天涯帳中不少羊羔酒只欠霜螯與菊花

虞山惠魚并示菊花畫冊詩以荅之

未得雙螯恰得魚相公嘉惠餉君餘冷官愛菊情尤劇畫裏清香足起予

燮理功能已足誇閒情猶自寄烟霞廣平先後相

輝映賦有梅花畫菊花

畫字實用

虞山復惠螯報謝

今朝食指動郭索稱心來宛飫郁公饌旋斟陶令杯鄉風魚稻裏生趣水雲隈

吾鄉富於蟹

頓爾增遐思

憑君一溯洄

巴彥溝中黃葉

家在江南黃葉村到來此地劇消魂蕭條已入荒寒境寥落猶含長養恩不定風搖初墮影無情雨打半彫痕倘能染得深紅色便有詩人仔細論

二句

爲後詩張本

紅葉

紅葉詩人競賦詩無心惟我不煩辭分明搖落風塵後卻染胭脂弄晚姿

那便紅於二月花只因憔悴滿天涯驀然一見成

希有也作徐娘老去誇

題虞山塞上青山紅樹圖

游藝周盧不任閑每從佳處識荆關東南山水摩
挲遍今日圖來塞上山

霜葉紅酣秋後姿毫端點染動人思頓忘此際蒼
涼景石徑寒山小杜詩

塞上題絡緯圖

此來機杼總無聲何事囂囂徹夜鳴想見香閨濃
睡穩喚回鴛夢月三更

時俗以籠
挂於簷際

軀小聲宏倒好嬉興安嶺上類偏奇可能飛向江

夕陽書屋詩初編卷四

三

南去消息吳娘仔細知

帳房即事示胡玉環侍讀

麤繒大布足周遮不任飄搖風雨斜來往頓教成
孔道起居渾忘是天涯車能代步聊安拙雞可爲
供未是奢獨有長安今又遠恐令兒女憶時差
僂指同官總望衡東西南北任縱橫吟殘燈火疎
疎夜踏碎冰輪緩緩行乍見已窺家室好深談足
耐短長更誰知鞅掌風塵會借此能杼舊雨情

即事東虞山

毳幕周旋氣味清令公香接幾經旬黑頭早踐沙

堤跡黃閣猶懷蕊榜春

公念同譜調零屢形歌咏

落紙雲烟推

妙手

公精於繪事屢以見示

堆棹魚蟹得鮮鱗

公時以食謾物見餉

勞拂拭增多愧私喜停驂恣討論

出哨口號

日中爲市總牛羊柔脆黃芽頓頓嘗莫道書生無

口福宵來已得腐羹香

熱河過謹堂先生舊寓有感

昨秋剝啄此經過促膝周盧笑語多剪燭憑君申

欸曲停杯爲我遡蹉跎

余以光祿卿謝恩赴熱河先生惜其晚遇嗟歎久之

慣陪羽獵思前躅旋愴人琴感逝波白馬素車

夕陽書屋詩初編卷四

孟

違所願神飛歸旆慟如何

聞嗣君以明日扶襯歸里

幻花八咏應制和張鵬翀學士韻

霜花

一夜金風散纈光蕭然秋氣掃濃粧慣隨舞劍紛
紛落乍點征衣得得忙蓬背無聲浮嫩蕊疎林有
葉綴寒香暗中頓爾流年換莫惹飛花滿鬢傷

雨花

乍喜廉纖入耳微旋驚滂沛散芳菲似無還有絲
絲見帶霧和烟陣陣飛蓑袂笠簷占氣候香燈禪
板識皈依太平有象甘霖遍認取篝車滿載歸

風花

披襟聊復一登臺左右清風宛轉回
噓拂早從蘋底見蕭騷旋向霧邊開
絕無根蒂扶搖上任爾飛揚動地來
誰與化工閑體物陳編還有渭南才

浪花

一葉扁舟溯水濱無端文綺散網緼
漁翁打槳層層出估客迎篙細細分
曾向潮頭觀起伏每從風裏感烟雲
春來吹皺池塘影面面疑開白練裙

燈花

銀燭青烟那足誇中宵一盞自成花
非關月滿猶

夕陽書屋詩初編卷四

五

添暈莫任風搖早護紗過眼榮枯雖頃刻薰人氣
燄不軟斜玉蟲倘送殊方喜已有輝光燦綺霞

酒花

新篛盞滿及春時開榼旋分賢聖姿
激灑頓教香撲鼻豐腴還見暈生肌
參軍得趣沾沾喜吏部潛窺細細知
欲識醇醪真面目好從花放一尋披

筆花

誰將不律燦雲霞三寸能開五色花
腕底青鏤原慧業毫端赤篆是名家
含葩吐萼生機出結幹垂條醉墨斜
聞道只今崇實學還憑夕秀謝朝華

心花

剝蕉抽繭竟何如，杼袖予懷未濶疎。
苔穎迴超凡艷外，靈根遙接瓣香初。
一腔爛熳歸冲淡，滿腹氤氳本靜虛。
騰躍百家矜變化，總憑方寸卷還舒。

射虎行

昨朝射四虎，天威耀神武。
一箭俵魂飛，殪虎如殪鼠。
馬上今朝小虎來，耽耽而視鋒稜開。
死者爾兄或爾父，咆哮搏噬安在哉。
絡首穿鼻如牛馬，英雄失路何爲者。
嗟爾被擒無蔽棘之死，生詎非福低頭下心歸上林飽食而嬉春草綠。

射鹿行

夕陽書屋詩初編卷四

壬

麋鹿居深山，與物本無競。
長林豐草間，亦各遂其性。
不畏虎豹狂，誰防弓弩硬。
近歷幾春秋，遠可百年亘。
烟霞侶神仙，繁衍滋毓孕。
所以高士儔，屢入金蘭咏。
如何時勢殊，爾獨陷於穽。
白露當初零，羽獵紛紛盛。
材官與武士，各得制爾命。
下下又高高，四面紛羅遺。
驅之復驅之，那得驚魂定。
帶箭或狂奔，脫網猶萌倖。
韓盧何處來，瞥然傷其脛。
種類似誅駢，道路看尸橫。
聚族幾年嗟，此一朝罄憶。
昔有虞世山，居游與并無。
難亦無災善氣相輝映，想

見率舞時百獸胥歡慶自不爾遐棄亦得瞻明聖
今昔豈殊科濯濯文園多尚有深山深可恃化日
光天任寢訛

送閣學鄒小山前輩 予告歸里

先生家住好山水一踐京華四十春寰海總知名
下士廟堂猶見古之人軒車絡繹疏宮傳 宸翰
褒揚賀季真此後江鄉應遲我白鷗不厭往來頻
他年造訪已
與先生成約

舟中人去已如仙舊雨臨歧倍黯然聯步分曹天

咫尺

先生曾同
官臺垣

吳頭楚尾路三千幾番烏鳥縈心

名陽書屋詩初編卷四

七

曲漫藉醇醪醉管絃倘得長康爲點筆故園松菊
畫圖傳

題項芝庭太守寫懷詩後即次其韻

早夜憂民鬢有霜至誠感格戢螟蝗河流浩浩馳
驅日燕寢凝香且未遑

撫字心勞盤錯多春生蔀屋袴襦歌循良自昔能

昌後玉樹亭亭見小坡

謂蔣岑
昆仲

一別春明幾歲華雲中江樹旅懷賒綠窗剪燭談
新績九陌爭傳露冕車

櫻筍江鄉可暫停卅年鷗夢霎時醒臨歧未許添

惆悵馬上山來一髮青

蘭渚姪看山樓圖

此樓是真州六朝山色供俯仰此樓是揚州金焦
北固愜幽賞自從挾策 帝京游齊魯青青透虛
幌岱宗翠黛壓樓頭睥睨衆山成土壤幾番拄頰
望中看西山秀挹朝來爽峯峰拱立起霞思點點
摩空發天想樓兮樓兮無定居總憑心地結方輿
胸次悠然具邱壑烟雲變幻神靈棲三層貞白非
同調百尺元龍任坐嘯到處有山到處樓此意可
爲知者道

夕陽書屋詩初編卷四

天

德定圃少司空松下讀書圖

珥筆當年侍

玉除芸臺祕笈討論初只今桃李

成陰後

定圃曾典試山西視
學山東分校禮闈

松下還披未見書

溪山一曲愛吾廬展卷清陰曝直餘聞說太平資
半部手吟口畫定何如

瑞芝歌爲秦澗泉學士賦

學士軒中著奇異黃芝一本從天賜前番乍見今
又生能不誇爲文字瑞先生文字本名家丹篆青
鏤筆有花含英咀華致仙卉風枝露葉相交聞
道讀書稱種子茗發穎監翩然起何曾芝草漫無

根實有由來非偶爾我朝四十四狀頭文采風流
君則優雛鳳高翔追老鳳他年可許撞烟樓猶記
吳趨老前輩謂文定申公芝生几上神所賚轉眼蓬山
最上層相業煌煌彪宇內竭來佳話復金陵君家
父子勃然興芝乎芝乎洵有靈再聽句臚第一聲

題京兆壁

一笑不形色孝肅六軍無犯韓昌黎古今人本不
相及况復彼時此一時

庚辰秋闈撤棘感賦

簪花七度聚奎堂銀燭光騰翰墨香不信暗中無

夕陽書屋詩初編卷四

三九

李薦敢云局外有歐陽紅綾飮座思疇曩玉筍分
行愧老蒼門下晨星今落落任君嘲笑陸家莊

送姚念慈之太原

西風匹馬曉寒侵執友臨岐思不禁准擬名經酬
晚節那堪除目負初心君屢躡場屋以修書得官非其志也文章典
重追謨誥教育殷勤見淺深君主金臺書院因才而教雋者接踵自
是憐才敦世誨早開鈴閣共清吟謂簡亭中丞

庚辰歸裝書囊硯匣外絕無長物戲作

卅年京洛買書頻緗帙縹囊次第勾得寸更番還
得尺傳經曾否當傳薪斑爛古色惟求舊翰墨清

香儼見新展卷一端差慰藉纖毫不惹庾公塵
曾從貞白侍高樓遺硯常深祖德羞柏府方嚴經
柱下花磚儒雅壓螭頭幾曾石破驚天藻依舊田
荒與拙謀皓首著書資爾力蒼茫北顧復何求

又賦二首

宦游相傍忽懸車韞匱盈箱返舊廬馬力疲時難
棄硯水痕深處爲添書研朱滴露情偏永刮垢磨
光願不疎眼底紛紛無故物也應兼嗜比熊魚
冷澹生涯晨夕俱牙籤髻匣總隨車餘齡涉獵歸
耕後老眼摩挲炳燭餘牀上縱橫非引睡池邊瀟
灑是中書久要此外無多子快意當前那得如

夕陽書屋詩初編卷四

三

舟中口號

騎馬勞乘船逸馬上回頭笑我遲船底伸眉羨君
疾疾徐總是一般忙殘月曉風同一律詰朝馬快
先入門骨肉團圓慶家室三日狂飈去住難激浪
翻波猶恐失未必乘船真個逸

喜晤家坦齋少宰

曾是湖山舊主人十年嵩洛付閑身雲霓尚繫蒼
黔望花柳猶含長養春邂逅觚稜情款款淵源水
木話諄諄

公源本新安族諡甚篤

郵亭醉墨誰欣賞拂拭能

消撲面塵

公於旅館壁間見
余舊作極蒙咨賞

鄒小山閣學來京重聚即送其南歸

鄉老今番成國老

公於錫山
聯十老社

飄然纓組帶烟霞光

華幾度騰天藻

公先年屢荷
予告後有詩寵行

宸章

圖畫何人入

帝家

內府奉
爲公繪像

命

倚杖看山行處有釀泉爲酒不

須賒他時擬泛剡溪棹柳暗花明一徑斜

夕陽書屋詩初編卷四

三

夕陽書屋詩初編卷四終

